

Tajuk : Rebut peluang dengan tajaan Technofund sebanyak RM3 juta

Rebut peluang dengan tajaan Technofund sebanyak RM3 juta

KUCHING: Timbalan Menteri Sains, Teknologi dan Inovasi Malaysia Datuk Fadillah Yusof menggesa lebih ramai usahawan Bumiputera dan kalangan ahli Dewan Usahawan Bumiputera Sarawak (DUBS) merebut peluang tanpa sempadan dengan tajaan Technofund sebanyak RM3 juta.

Katanya Sarawak mendapat keutamaan setelah diletakkan sebagai tumpuan pusat untuk kajian sains antarabangsa dan banyak diberikan namun kurang yang memohon dana terbabit.

Bagaimanapun, bidang-bidang yang harus diceburi oleh para usahawan adalah pemacu teknologi yang berasaskan perkara baharu.

“Penyelidikan dan Pembangunan (R&D) masih kurang di kalangan orang kita, tidak banyak usahawan dan pengusaha industri kecil dan sederhana (SME) yang memohon

dan hanya dua sahaja yang telah memohon setakat ini dari negeri ini iaitu untuk memajukan benih kambing dan sagu.

“Tidak salah jika kita gunakan keputusan kajian yang dijalankan oleh institusi penyelidikan daripada UNIMAS, Swinburne, Curtin dan hasilkan produk akhir mengikut permintaan pasaran semasa,” katanya ketika merasmikan Majlis Mesyuarat Perhimpunan Perwakilan Tahunan (MPPT) dan Majlis Makan Malam MPPT Ke-20 DUBS kelmarin.

Beliau mengingatkan, tarikh membuat permohonan dan penilaian harus dihantar ke kementeriannya sebelum 31 Disember ini.

Kementeriannya turut menyediakan khidmat nasihat dan bantuan panduan mengisi borang permohonan manakala jawatankuasa penilai terdiri daripada pakar akademik atau usahawan.